


**SI JESUS
ANG MULING PAGKABUHAY
AT ANG BUHAY**



Sa Araling Ito'y Pag-aaralan Mo

Nagtagumpay sa Kamatayan si Jesus
Mga himalang kalakip ng muling pagkabuhay
Katibayan ng Kanyang muling pagkabuhay
Kapangyarihan ng Kanyang muling pagkabuhay

Si Jesus at ang ating Muling Pagkabuhay
Ang Kanyang pangako
Ang katuparan nito

Nagtagumpay sa Kamatayan si Jesus

Si Jesus ay namatay para sa ating mga kasalanan at muling nagbangon upang bigyan tayo ng buhay na walang hanggan! Ito ang puso o buod ng Cristianismo. Ang mga dakilang katotohanan ng Biblia, ang salita ng iisa at tunay na Diyos, ay nagtatampok sa katunayang muling nabuhay si Jesus. Kung hindi Siya nagbangon sa libingan, ang buong plano ng kaligtasan ay bigo. Nguni't napagtagumpayan Niya at nasupil ang kamatayan kaya kilala natin Siya ngayon bilang ating buhay na Panginoon at Tagapagligtas.

Mga himalang Kalakip ng Muling Pagkabuhay

Pinatunayan ni Jesus na may kapangyarihan Siya sa kamatayan noong panahon ng Kanyang paglilingkod. Nakatala sa Biblia ang pagbuhay Niya sa tatlong patay.

Si Jairo na isang mataas na punong-bayan ay humiling kay Jesus na pagalingin ang kanyang anak na babae. Nang magbalik siyang kasama na si Jesus, patay na ang bata.

Lucas 8:52,54, 55. Nananaghoy ang lahat ng naroon at tinatangisan ang patay. Nguni't hinawakan ni Jesus ang kamay nito at sinabi, "Ineng, bumangon ka." Nagbalik ang kanyang hininga at siya'y bumangon.

Buhat-buhat ng mga tao ang kabaong ng anak ng isang babaing balo na taga-Nain pantungo sa libingan nang makasalubong nila si Jesus. Itinigil nito ang pulutong na iyon.

Lucas 7:14,15. Lumapit siya at hinipo ang kinalalagyan ng patay at tumigil naman ang mga may dala nito.

Wika niya, "Binata, sinasabi ko sa iyo, bumangon ka!" Naupo ito at nagsalita; at siya'y ibinigay ni Jesus sa kanyang ina.

Si Lazaro, Marta, at Maria ay magkakapatid at mga matalik na kaibigan ni Jesus. Namatay si Lazaro at inilibing. Pagkalipas pa ng apat na araw saka dumating si Jesus.



Juan 11:43,44. Sumigaw siya, "Lazaro, Lumabas ka!" Lumabas nga ang namatay; napupuluputan ng kayong panlibing ang kanyang mga kamay at paa, at nababalot ng panyo ang kanyang mukha. Sinabi ni Jesus sa kanila, "Kalagan ninyo siya, at nang makalaya."

Ang muling pagkabuhay ni Jesus ang pinakadakilang tagumpay sa ibabaw ng kamatayan. Ang mga binuhay Niyang muli ay mga tao pa rin . . . namatay silang muli. Nguni't si Jesus ay nagbangon mula sa libingan taglay ang katawang walang kamatayan. Hindi na Siya mamamatay. Nadaig na Niya ang kamatayan.

Ang Gagawin Mo

1. Isulat ang tatlong taong binuhay ni Jesus

.....
.....
.....

2. Gaano katagal nang nakalibing si Lazaro?
.....
3. Ano ang pinakadakilang tagumpay ni Jesus laban sa kamatayan?
.....
4. Ano kaya ang nangyari sa plano ng kaligtasan kung hindi nagbangon mula sa mga patay si Jesus?
.....

Katibayan ng Kanyang pagkabuhay na muli

Paano natin matitiyak na nabuhay ngang muli si Jesus? Ito ang isang pangyayari sa kasaysayan na ibig pabulaanan ng iba subalit napatunayan namang totoo. Narito ang sampung katibayan, bagaman marami pang iba:

1. *Ulat ng mga kawal.* Binantayan ng mga kawal ang tinataakang yungib na pinaglibingan sa bangkay ni Jesus upang hindi ito nakawin at sa gayo'y masabi ngang nabuhay Siya. Noong pangatlong umaaga, nakita nilang binuksan ng isang anghel ang libingan. Lumindol nang malakas. Natakot sila.



At nakita nilang wala nang laman ang libingan! Wala na ang bangkay ni Jesus! Nagtakbuhan sila upang iulat ang nangyari.

2. *Libingang walang laman at ang damit ng patay.* Di nagluwat, may mga babaing dumalaw sa libingan. Wala na roon si Jesus. Sinabi sa kanila ng dalawang anghel na nabuhay si Jesus. Pinuntahan din nina Pedro at Juan



ang libingan at wala silang nakita. Wala na roon ang katawan ni Jesus, ngunit naroon pa rin ang telang ipinambalot sa bangkay. Maayos na nakapulupot, gaya ng pinagmulan ng higad na naging paruparo. Kung

may nagnakaw man ng bangkay, hindi na ito mag-aabalang ipulupot muli ang telang ipinambalot dito.

3. *Pahayag ng mga anghel.* Ang wika ng mga anghel na dinatnan ng mga babae sa libingan.

Lucas 24:5,6. "Bakit ninyo hinahanap ang buhay sa gitna ng mga patay? Wala na siya rito — siya'y muling nabuhay."



4. *Napakita si Jesus.*



Gawa 1:3. Pagkatapos ng kanyang pagbabata, maraming ulit siyang napakita sa kanila. Sa gayon napa-tunayang siya'y buhay. Napakita siya sa kanila sa loob ng 40 arawat nagturo tungkol sa kaharian ng Diyos.

Si Jesus ay napakita sa iba't ibang panahon:
 Sa isang pangkat ng kababaihan
 Kay Maria Magdalena
 Kay Pedro
 Sa dalawang alagad sa daang patungo sa
 Emaus
 Sa sampung alagad sa Jerusalem
 Sa labing-isang alagad sa Jerusalem
 Sa pitong alagad sa Dagat ng Galilea
 Sa 500 mananampalataya sa Galilea
 Kay Santiago na kapatid ni Jesus sa ina
 Sa mga alagad bago siya umakyat sa langit,
 malapit sa Betania ang pinangyarihan nito.
 Napakita rin si Jesus sa tatlong tao mata-
 pos siyang makabalik sa langit. Siya'y nakita
 nila roon.

Kay Esteban, unang martir na Cristiano
 Kay Saulo (Pablo) sa daang Damasco
 Kay Juan sa Apocalipsis o Pahayag

5. *Ang bagong katawan ni Jesus.* Ang na-
 iibang uri ng katawan ni Jesus matapos si-
 yang mabuhay na muli ay nagpatunay ng da-
 lawang bagay: (1) Hindi guniguni o espiritu
 lang ang nakita ng mga mananampalataya.



Siya'y nahipo nila. Totoong ka-
 tawan iyon na may laman at
 buto. (2) Hindi Siya natauhan
 lamang matapos na manatili sa
 tinatawag na "coma" o nabuhay
 at may katawan pa rin tulad ng
 tao. Iyon ay katawang niluwal-
 hati, at hindi na nasasakop ng
 pagkakasakit o kamatayan. Nakapapasok
 Siya sa pinid na pinto. Nakalilitaw Siya o
 nakapaglalaho kung ibig Niya. Siya'y nakita
 nila nang umakyat sa langit. Sa muling pag-


kabuhay, nagkaroon ng bagong kapangyarihan ang kanyang katawan.

6. *Ang Bautismo sa Espiritu Santo.* Ang naganap noong Pentecostes ay katuparan ng pangakong iniwan ng nagbangong Cristo. Ang nagpapatuloy na pakikisama ng kanyang Espiritu ay nagpapatunay na buhay nga si Jesus.

7. *Patotoo ng mga Cristiano.* Palaging nagpapatotoo ang mga tagasunod ni Jesus na ito nga'y nagbangon sa libingan. Kahit inutusang ipagkaila ito kung di nila ibig mamatay, pinili rin nila ang kamatayan. Hindi sila namatay dahil sa pagtatanggol sa isang kasinungalingan.



8. *Ang pagbabalik-loob ni Saulo.* Si Saulo, matalino at kabataang bihasa sa kautusang Judio, ay nagsisikap na malipol ang Cristianismo. Nang patungo sa Damasco para dakpin ang mga Cristiano, siya ang nadakip ng Panginoong Jesus. Isang ilaw na maliwanag pa kaysa araw ang suminag mula sa langit. Buhat sa ilaw, si Jesus ay tumawag kay Saulo at kinausap tungkol sa ginagawa niyang paglaban sa Panginoon. Isinuko ni Saulo kay Jesus ang kanyang buhay at siya'y naging si apostol Pablo, ang dakilang lingkod ni Cristo.





9. *Cristianismo.* Ang pananampai atayang Cristiano ay salig sa katotohanan ng muling pagkabuhay. Nakatatag sa libingang walang laman ang Cristianismo.

10. *Pakikiugnay kay Jesus.* Nabago ang ating buhay nang makaugnay natin si Jesus. Araw-araw, Siya'y kinakausap natin. Tinutugon naman Niya tayo. Sabi nga ng awit:

Buhay ang Cristong
Aking pinaglilingkuran,
Tandang mo'y bakit ko alam?
Sa puso ko'y buhay!



Ang Gagawin Mo

5. Ilista ang sampung bagay na bata-
yan ng paniniwala natin na si
Jesus ay nabuhay ngang muli.

.....
.....
.....
.....
.....
.....
.....
.....
.....
.....

6. *Isipin mo.* Ano ang pagkakatulad
ng bagong katawan ni Jesus sa
dati? Paano naman ito naiiba?
Ibig mo bang magkaroon ng nilu-
walhating katawan?

Kapangyarihan ng Kanyang muling pagka -- buhay

Si Jesus ay namatay sa krus ngunit mula
roon napagtagumpayan Niya ang kamatayan.
Ang krus, na sagisag ng kahihyan ay ginawa
Niyang sagisag ng katubusan, kapangyarihan,
at tagumpay. Inilagay sa libingan ang kata-
wan ni Jesus, subalit hindi Siya mapigilan
ng libingan. Dinaig Niya ang kamatayan at
nagbangon upang ibahagi sa lahat ng tagasu-
nod Niya ang tagumpay na ito. May sinulat

si Pablo tungkol sa pagkakilala kay Jesus sa pamamagitan ng kapangyarihan ng Kanyang muling pagkabuhay. Ano kaya ang kapangyarihang ito?

1) *Katibayan kung sino si Jesus.* Siya'y nabuhay ngang muli, kaya alam nating Siya nga yaong sinabi. Niya tungkol sa Kanyang sarili — ang Anak ng Diyos at Tagapagligtas ng sanlibutan.

2) *Katiyakan ng kaligtasan.* Siya'y nabuhay ngang muli, kaya alam nating tinanggap ng Diyos ang hain Niyang buhay para sa atin. Sinumang nananalig sa Kanya ay magkaka-mit ng patawad sa kanyang mga kasalanan.

3) *Bagong Buhay sa pakikiisa kay Jesus.* Ang ating Panginoon na muling nabuhay ay naging Ulo ng iglesya. Tayo ang kanyang katawan. Lagi Siyang sumasaatin at nasa atin ang buhay Niya. Kumikilos sa pamamagitan natin ang Kanyang kapangyarihan.

1 Pedro 1:3. Tayo'y isinilang sa isang panibagong buhay sa pamamagitan ng muling pagkabuhay ni Jesu-Cristo.

4) *Tagumpay sa pamamagitan ni Jesus.* Ang muling pagkabuhay ni Jesus ay patunay na tinalo Niya si satanas, ang kasalanan, at ang kamatayan. Kung kasama mo Siya, hindi ka dapat mamuhay na takot o inuusig ng kasalanan at ng tukso. Pinapagtatagumpay Niya ang iyong pagkatalo.

5) *Pag-asa.* May pag-asang haharapin ng mga Cristiano ang kamatayan pagka't pinatitibayan ni Jesus sa kanyang muling pagkabuhay na may higit na mabuting buhay sa kabila ng libingan. Sabi niya:

Juan 14:19. "Sapagka't mabubuhay ako, ay mabubuhay rin kayo."

6) *Muling pagkabuhay.* Kapag kinikilala mo si Jesus at ang kanyang muling pagkabuhay, ikaw ma'y muling bubuhaying tulad niya sa gayon ding uri ng katawan.

1 Corinto 15:20. Si Cristo'y muling binuhay bilang katibayan na muling bubuhayin ang mga patay.

Ang Gagawin Mo

7. Magbigay ng anim na bagay na matatanggap natin dahil sa muling nabuhay si Jesus. Salungguhitan yaong naranasan mo na.

.....
.....
.....
.....
.....

8. Magpasalamat sa Diyos dahil sa karapatang ibinigay sa iyo na maki-lala si Jesus at ang kapangharihan ng muli Niyang pagkabuhay.

Si Jesus at ang ating muling Pagkabuhay

Ang Kanyang pangako

Bago binuhay si Lazaro, ang sabi ni Jesus:

Juan 11:25,26. "Ako ang muling pagkabuhay at ang buhay. Ang nananalig sa akin, kahit mamatay ay muling mabubuhay, at sinumang nabubuhay at nananalig sa akin ay hindi mamamatay kailanman."

Nang tumawag si Jesus sa harap ng bukas na libingan, "Lazaro, lumabas ka!" si Lazaro nga'y lumabas na buhay at malusog. Balang araw, babalik dito sa lupa si Jesus. Pag siya'y tumawag, babangon ang mga bangkay na matagal nang naging alabok at abo, parang mga halamang buhat sa binhi. Magkakaroon tayo ng kahanga-hanga at bagong katawang tulad ng sa kanya, walang kamatayan at niluwalhati.

Juan 5:24,26,28,29. Ang nakikinig sa aking salita at nananalig sa nagsugo sa akin ay may buhay na walang hanggan. Hindi na siya hahatulan kundi inilipat na sa buhay mula sa kamatayan. Ang Ama ay may kapangyarihang magbigay-buhay at ang Anak ay binigyan niya ng kapangyarihang magbigay-buhay . . . sapagket darating ang oras na maririnig ng mga patay ang kanyang tinig. Sila'y muling mabubuhay at lalabas sa kinalilibingan nila. Lahat ng gumawa ng mabuti ay pagkakalooban ng buhay na walang hanggan at lahat ng masama ay parurusahan.

Ang sementeryo sa inyong lugar ay may pasabi para sa iyo. Sa iba, ito'y kawalang-pag-asa. Ang mga libingan ay nagpapaalaala sa atin na mamamatay tayong lahat. Naparito tayo sa sanlibutan na walang dala at aalis din tayo na walang dala. Ngunit di lamang iyon. Alalahanin mong ang libingan ni Jesus ay walang laman. At ang Kanyang muling pagkabuhay ang katiyakan na ikaw ma'y muling mabubuhay kung Siya ang iyong Tagapaglig-tag. Mamamatay ang katawan mo, ngunit hindi ang iyong espiritu. Kahit magbalik sa lupa ang katawan mo, muli itong bubuhayin

ni Jesus. Siya ang Muling Pagkabuhay at ang Buhay.

Ang Gagawin Mo

9. Ano ang pinakatiyak nating garantiya na tayo'y muling mabubuhay?
.... a) Pagpapanibago ng buhay sa kalikasan.
.... b) Palasak na paniniwalang may buhay pagkamatay.
.... k) Ang muling pagkabuhay at pangako ni Jesus.
10. Isaulo ang Juan 11:25, 26.
11. Ano ang tawag ni Jesus sa kanyang sarili sa Juan 11:25.

Ang katuparan nito

Bago nagbalik sa Kanyang tahanan sa langit, nangako si Jesus sa Kanyang mga tagasunod na Siya'y magbabalik.

Juan 14:3. Kapag naroroon na ako at naipaghanda na kayo ng matitirhan, paririto akong muli at isasama ko kayo sa kinaroroonan ko.

Apatnapung araw matapos muling mabuhay, si Jesus ay nakita ng Kanyang mga tagasunod na umakyat sa langit. At dalawang anghel ang nagpahayag sa kanila nito:

Gawa 1:11. Itong si Jesus, na umakyat sa langit, ay magbabalik tulad ng nakita ninyong pag-akyat niya.

Ipinakita ng Diyos kay Pablo ang maraming bahagi ng muling pagkabuhay na magaganap pag muling naparito si Jesus. Isinulat din ni Juan ang tungkol dito.

1 Corinto 15:37,38. 42-44,49,51-54,57. At ang inihahasik ay hindi punong malaki na, kundi binhi, tulad ng butil ng trigo o ng ibang binhi. Ang Diyos ang nagbibigay ng katawan sa binhing iyon, ayon sa kanyang itinalaga: bawat binhi'y binibigyan niya ng angkop na katawan. Ganyan din sa muling pagkabuhay. Ang katawang inilibing ay mabubulok, ngunit ang katawang muling binuhay ay di mabubulok kailanman. Pangit at walang kaya nang ilibing, maganda't malakas pagkatapos na buhayang muli. Inilibing na katawang panlupa, muling mabubuhay na katawang panlangit. Kung paanong tayo'y katulad ng taong nagmula sa lupa, darating ang araw na matutulad din tayo sa nanggaling sa langit.

Pakinggan ninyo ang hiwagang ito: hindi tayong lahat ay mamamatay nguni't tayong lahat ay babaguhin sa isang sandali sa isang kisap-mata, kasabay ng huling tunog ng trompeta. Pagtunog ng trompeta, ang mga patay ay muling bubuhayin at di na mamamatay. Tayong lahat ay babaguhin, sapagka't itong katawang nabubulok ay dapat mapalitan ng di nabubulok at ang katawang mamamatay, ng di namamatay . . . matutupad ang nasasaad sa Kasulatan: "Nalupig na ang kamatayan; ganap na ang tagumpay!" Magpasalamat tayo sa Diyos na nagbibigay sa atin ng tagumpay sa pamamagitan ng ating Panginoong Jesu-Cristo!

Filipos 3:20,21. Sa kabilang dako, ang langit ang tunay nating bayan: mula roo'y hinihintay nating may pananabik ang Panginoong Jesu-Cristo. Babaguhin niya ang ating katawan lupa at gagawing maluwal-

hati, tulad ng kanyang katawan, sa pamamagitan ng kapangyarihang ginamit niya sa pagpapasuko sa lahat ng bagay.

1 Juan 3:2,3. Sa pagparitong muli ni Cristo tayo'y matutulad sa kanya sapagkat maki-kita natin siya sa kanyang likas na kalagayan. Kaya't ang sinumang may pag-asa sa kanya ay nagpapakalinis, tulad ni Cristo-siya'y malinis.

1 Tesalonica 4:16-18. Sa araw na yaon, kasabay ng malakas na utos, ng tinig ng arkanghel, at ng tunog ng trompeta ng Diyos, bababa ang Panginoon mula sa langit. Bubuhayin muna ang mga namatay na nana-nalig kay Cristo. Pagkatapos, tayong mga buhay pa ay kanyang titipunin sa ulap at isasama sa mga binuhay upang salubungin sa papawirin ang Panginoon. Sa gayo'y makakapiling niya tayo magpakailanman. Kaya nga, mag-aliwan kayo sa pamamagitan ng mga aral na ito.

Ang Gagawin Mo

12. Kailan magaganap ang muling pagkabuhay sa atin?
13. Ano ang ipinagagawa sa atin sa 1 Juan 3:3 para maging handa?
14. Salungguhitan ang mga bahagi ng mga talatang ito sa Biblia na nakantig na mabuti sa iyo.

Markahan ang iyong mga sagot.

Ika-9 na Aralin — Mga Sagot

Ang hinihingi ng mga tanong ay 26 na sagot. Mula 23 hanggang 26 ay napakahusay na antas; 19 hanggang 22 ay mabuti; 13 hanggang 18 ay katamtaman. Kung wala pang 13 ang sagot mong tama, basahing muli ang aralin.

1. Ang Anak ni Jairo, ang anak ng balong taga-Nain, si Lazaro.
2. Apat na araw
3. Ang kanyang muling pagkabuhay.
4. Ito'y nabigo sana.
5. 1) Ulat ng mga kawal. 2) Libingang walang laman at ang damit ng patay. 3) pahayag ng mga anghel. 4) Napakita si Jesus; 5) Ang bagong katawan ni Jesus; 6) Ang Bautismo ng Espiritu Santo; 7) Patotoo ng mga Cristiano; 8) Ang pagkahikayat ni Saulo; 9) Cristianismo; 10) Pakikiugnay kay Jesus.
7. 1) Katibayan kung sino si Jesus; 2) Katiyakan ng kaligtasan.
- 3) Bagong buhay sa pakikiisa kay Jesus; 4) Tagumpay sa pamamagitan ni Jesus; 5) Pag-asà; 6) Muling pagkabuhay.
9. k) Ang muling pagkabuhay at pangako ni Jesus.
11. Ang muling Pagkabuhay at ang Buhay
12. Pag muling naparito si Jesus.
13. Manatiling malinis.

Bilang ng mga tamang sagot Antas
Punan ngayon ang iyong tala ng mag-aaral para sa
ika-9 na Aralin.